

UTUSAN MALAYSIA

DATE: 27/6/2008

PM perjelas kenaikan minyak

KUALA LUMPUR 26 Jun - Kenaikan harga minyak merupakan satu fenomena global dan antara sebab utama kenaikan harga minyak yang melampau pada waktu ini adalah keadaan geopolitik dunia yang tidak menentu, kata Datuk Seri Abdullah Ahmad Badawi.

Perdana Menteri berkata, serangan ke atas Iraq oleh Amerika Syarikat pada tahun 2003 telah melumpuhkan sebuah daripada negara pengeluar minyak utama dunia dan menimbulkan keadaan kacau-bilau di rantau Asia Barat yang masih belum reda.

Menurutnya, serangan ke atas Afghanistan sebelum itu turut membawa impak negatif kepada kestabilan harga minyak di pasaran dunia dan paling mutakhir, ancaman Israel menyerang Iran turut menyumbang kepada ketegangan geopolitik yang membawa kepada kenaikan harga minyak.

um- 27/6/2008
*Kajian
Separuh Penggal*

RMK-9

Selain itu, kata beliau, permintaan tinggi oleh negara tertentu seperti China dan India, di samping keengganan negara-negara Pertubuhan Negara Pengeluar Minyak (OPEC) untuk menaikkan tahap pengeluaran minyak secara ketara juga merupakan antara penyebab utama kepada kenaikan harga minyak.

"Keadaan ini diburukkan lagi oleh kegiatan spekulator pasaran minyak di pusat kewangan antarabangsa seperti New York dan London, yang turut menyuntik ketidak-tentuan dalam suasana harga minyak yang semakin meruncing," katanya semasa membentangkan Kajian Separuh Penggal Rancangan Malaysia Kesembilan (RMK-9) pada persidangan Dewan Rakyat hari ini.

Abdullah berkata, di samping kenaikan harga minyak yang melampau, ekonomi negara turut dihimpit oleh keadaan pasaran kewangan sedunia yang masih belum pulih daripada krisis subprima.

Malah, katanya, ramai pakar ekonomi menjangkakan krisis itu mampu membawa kepada kemelesetan ekonomi sedunia, yang pastinya akan turut mengheret ekonomi Malaysia ke dalam suasana gawat.